

行  
在  
陽  
秋

行在陽秋下

六年閏正月

朔駕在安隆州

二月二十五日吳三桂破嘉定州總兵白文選預遁

清杜繼茂兵入欽州開國公趙印選預遁

杜永和守瓊州降清

三月初八日湖北晝晦大風揚沙至持燭而行

官軍復沅州又復平遂衛藍田縣

清破佛圖關遂陷重慶

夏四月二十日清入叙州總兵王俊臣白文選退  
守永寧

故四川提學任佩弦降于吳三桂

十一日德州雨雹大者如瓜殺三人沉漕舟一

十三日清殺南陽伯孫元胤安肅伯李建捷

元胤聞杜永和之降慟哭三日夜清遂殺之投

尸江中時前鋒將周彩安肅伯李建捷亦成棟

養子與元胤義兄弟也建捷嘗從杜永和先登

廣州敗走蒼梧與元胤同護蹕亦隨海內欽州

作難已登舟出海聞元胤被執遂願與同死

十八日官軍復清州擒斬清總兵楊國勛

念一日孫可望自靖州率衆攻湖南清帥沈永忠  
遣張國柱禦戰可望擊敗之

六月荆江侯張先璧朝行在封沅國公

晉馬進忠鄂國公

吳三桂破石泉縣巡撫詹天顏及曹淇等俱被獲

天顏福建人

秋七月庚午朔復寶慶

初四日安西王李定國平東王孫可望復桂林孔  
有德陳邦傅曾盛祖秘希孔承先孫龍孫延世董  
英袁道先等伏誅

可望自行在出寶沅定國帥偏師輕騎扼有德  
于桂林旬日下數十城有德自刎已獲其幼子  
置軍中至十三年己亥春殺之

十一日庚辰黃霧四塞

復永州

擒斬清紀國相鄧胤昌姚杰等數十人

八月十六日復夷陵

十八日建極殿大學士朱天麟卒于廣南府予祭  
葬廕一子中書舍人謚文靖

孫可望敗清于靖州

可望駐長沙善安縣

博典侯張月降于清

九月清再陷梧州

杜永和張月執提督李明忠降于清

詔授文日章爲攸縣知縣

吳三桂兵至龍安邊堡

冬十月撫南王劉文秀攻保寧未克

文秀自綿州出攻保寧十日吳三桂至文秀撤  
圍退

十一月十三日官軍復衡州擒清辰州總兵徐勇  
及劉升祚等

十九日清兵至湘潭馬進忠退守寶慶

二十三日清再陷衡州

總兵馬 敗死

十二月初五日清陷藤縣總兵羅超戰歿再陷賀縣

二十九日清兵入平樂縣平彭俊陣歿

是歲封莫宗文安仁伯

七年癸春正月朔駕在安隆州

二月李定國馬進忠兵入永州

二十八日永州陷李定國走龍虎關

孫可望駐靖州總兵馮壯力駐奉天

清帥耿繼茂破廉州道臣王道光被執死



道光江西庚午舉人初任雲南太和知縣

三月武陵候楊國棟安仁伯莫宗文攻常德不克  
十七日孫可望禦清兵于周家堡敗回寶慶

安西王李安國敗于肇慶退駐柳州

夏四月郝尙文復以潮州內附斬清知府薛信辰  
五月封楊時清征定候

六月初四日潮陽再陷

閏月初九日安西王李定國出師廣州攻肇慶  
二十六日總兵周金湯攻復遂溪降其守將陳琪

秋七月李定國復化州吳川信宜石城定國以施  
尙義守化州

初九日李定國離肇慶

十三日李定國遣兵入賀縣樂平

二十一日李定國率兵二萬攻聞廣西賊不克

定國圍七晝夜清兵自奉天至定國解圍

總兵王之邦卜寧張蓋陣歿于陽朔

叛將趙文貴執四川道孫胤乾至保寧獻于清

孫可望駐奉天

李定國兵擒斬清廣西巡撫王荃可

八月初五日石城遂溪陷

化州陷

九月十四日潮州再陷新太候郝尙文父子投井死潮州道李兆京被獲死

以王立功內應也尙文一作尙久以功歷陞總兵守潮州清至以城降附戊歲李成棟內附尙文復正朔詔以爲將軍仍駐潮州李敗復降清爲潮州總兵尋加銜管水師中疑不肯越省城

癸巳復奉正朔自稱復明將軍挾諸鄉紳入城  
盡反清所署官屬願從者仍與原銜不願者拘  
留之唯教官以下聽下各邑追印多挾印去空  
城以待惟龍溪知縣焦某舉城歸之至是清以  
重兵壓之尙文父子投井死一日自縊死  
冬十月清師尙可喜陷吳川縣

陳彝典陳其策被殺

十一月二十日清督祖澤遠援鄖陽

十二月十三日清破郴州桂東縣黃蠟潭巡撫朱

俊臣陷陣死總兵羅念等降

是歲官軍擒斬清廣西右江道參議金漢蕙樂平知府尹明廷廣西副將溫如珍降清

入年甲午春正月 胡駕在安隆府以吳貞毓爲

大學士

孫可望駐靖州

二月安西王李定國帥兵入高州張月來歸

夏四月初十日李定國兵至雷廉遣將攻復羅定新興石城電白陽江陽春等縣

六月李定國遣將攻梧州不克

官軍擒斬清湖廣湖北道右參議劉鼎祚辰州知府王仕玘

秋七月遣內臣至廈門島冊封朱成功爲延平王  
二十六日平遠再陷

冬十月初三日官軍攻圍廣州

十一月詔改安隆州爲府改都康萬承安平龍安諸州爲府

十二月 朔延平王克復漳州

初六日李定國攻新會縣

十四日清援廣州官軍解圍

十六日李定國攻肇慶不克還廣西

南寧巡撫張起致仕

起與孫可望標將賀九儀不和故也

是歲予大學士吳貞毓自盡殺張鏹十餘人

詔曰朕以眇躬繼茲危緒上承祖宗下臨臣

庶闕今八載險阻傳嘗朝夕焦勞罔有攸濟自

武衡肇楮以至邕新播遷不定茲冬瀨湍倉卒

西巡苗裔于前虜迫于後賴秦王嚴兵迎扈得以出險定蹕安隆獲有寧字數月間捷音叠至西蜀三湘以及八桂洊歸版圖憶昔封拜者纍纍若若類皆身圖自極任事竟無一人惟秦王力任安攘毘于一人二年以來漸有成緒朕實賴之乃有罪臣吳貞毓張鏞張福祿全爲國徐極鄭光元蔡宿趙廣禹周允吉易士佳楊鍾任斗樞朱東旦李頎蔣乾昌朱議泉李元開胡士瑞包藏禍心內外連結盜寶矯勅擅行封賞貽



禍封疆賴 祖宗之靈奸謀發覺隨命朝廷審  
鞫除賜輔臣吳貞毓死外其張鏞張福祿等同  
謀不法蒙蔽朝廷無分首從宜加伏誅朕以類  
年患難扈從無幾故馭下之法時從寬厚以至  
奸回自用盜出掖廷朕德不明深自刻責此後  
凡大小臣工各宜洗滌廉法其守以待昇平

附孫可望奏爲行在諸奸矯敕盜寶擅行節節  
大爲駭異隨奉 皇上賜書將諸奸正法仰見

乾綱獨攬離炤無私首惡吳貞毓張鏞張福祿

也爲從者徐極蔡宿等也 皇上立寔重典以彰國法矣蓋李順臣弟也勦虜失律法自難寬方責圖功以贖前罪而敢盜寶行封是臣議罰諸奸反以爲應賞矣且臣所部諸將士比年來艱難百戰應賞應罰惟臣得以專之故名器宜重早已具疏付楊畏知奏明卽畏知之服上刑亦以晉中樞旋晉內閣之故原疏具在可復閱也因憶兩粵並陷時 駕蹕南陵國步旣已窮蹙加之叛爵焚劫于內虜首彎弓于外大勢岌

炭卒令駝隊潛跡宴然無恙不謂非賀九義等  
遵王朝令星馳入衛之力也又憶瀨湍移蹕時  
危同累卵諸奸惡力阻幸黔堅請隨元胤敗死  
使果幸防城則誤主之罪寸磔遂足贖乎茲蹕  
安龍三年矣纔獲寧宇又起風波豈有一防城  
一元亂可以再陷 聖躬乎臣累世力農未叨  
一命之榮升斗之祿亦非原無位號不能自雄  
者也沙定洲以雲南叛臣滅定洲而有之又非  
無屯兵難于進攻退守者也總緣孤憤激烈冀

留芳名于萬古耳卽秦王之寵命初意豈能覲  
此哉故楊畏如之齎奏疏中有云今之奏請爲  
聯合恢勦之意原非有意以求封爵也臣關西  
布衣據彈丸以供駐蹕願 皇上臥薪嘗膽毋  
忘瀕湍之危如 皇上以安隆僻隅錢糧不敷  
欲移幸外地唯聽膚斷自當備辦夫馬錢糧護  
送駕行斷不敢阻以蒙要挾之名

前南寧知府顧祖奎卒

祖奎吳江人祝髮爲僧卒于肇慶之白雲寺

九年紀春正月

朔駕在安隆府

二月孫可望駐貴州以部將朱養思守南陵

安西王李定國自賓州入南寧

撫南王劉文秀駐川南

三月二十九日昭平陷

屬平樂倪志倫歐光大袁啟祕徐麟俱降清

夏四月二十六日李定國兵敗于

標將王成張士祿嶺西道陸士瑞 道李昇東

安知縣羅大經俱降清

五月二十三日劉文秀馬進忠與武大定等攻常  
德不見

冬十月蜀鎮胥登榮降于吳三桂

一作胥發榮明年正月降

十年丙申春正月朔駕在安隆府

夏四月安西王李定國迎駕入雲南

定國兵至州詭爲清兵戰敗孫可望部將關  
有才之兵遂奉詔入安隆州執可望家屬以去

六月滇南恩恭俱降清

秋七月義寧伯龍韜駐柳州

韜與李定國爲應援旋被獲死

十八日延平王攻福京

九月十九日清入辰州

冬十月夔州巡撫鄧希明總兵張元凱降于吳三桂

希明自獻賊亂後與元凱同屯墾開縣入覲安

隆授官

十一年丁酉春正月

朔駕駐旗都

進李定國爲晉王

秋九月秦王孫可望謀叛移師犯滇晉王李定國  
蜀王劉文秀奉命討之師次曲靖府十九日戰于  
交水可望奔潰

念一日叛藩孫可望遣賊將張勝間道襲滇中書  
科中書舍人朱斗垣遇賊不屈死之

先是可望謀逆其部將白文選將所屬來歸

土嘉之封文選爲鞏昌王遣尙寶司楊楨幹中  
書朱斗垣賫敕往曲靖軍中途遇賊兵遂爲所



害

二十二日晉王李定國班師援滇擊張勝于渾水塘擒之斬于市

保國公王尙禮卒于滇中

以馬吉翔爲大學士李國爲春司禮監

進撫南王劉文秀爲蜀王

是年文秀遣總兵王俊臣姚之貞等統兵三萬人攻保寧爲吳三桂所敗俊臣之貞俱死喪卒千餘

萬翱彭萬夫李春秀等降于清

翱原任兵部尙書萬夫爲某官春秀舉人降于清偏沅巡撫袁廓宇

冬十一月十五日孫可望降于清

可望爲定國所敗率家卒數千人請保慶降于清封可望爲義王後隨出獵被射死初可望却將桑某者降歸定國故可望窮蹙奔降桑某後爲清兵獲械至北京人見桑慷慨自若竟釋之

十二月清兵攻雲貴

泗城州土官岑繼祿降清爲嚮導引清兵從間道直抵安隆時晉王李定國守盤江聞報自統精兵三萬人倍道趨戰我師敗績

十二年

戊戌

春正月

朔駕在滇都

二月原任總兵鄧凱朝行在

凱江西吉安人初同楊廷麟劉同升萬元吉龔棻寺奉隆武正朔起兵江西其父某死國事

夏四月官軍克橫州

秋八月十七日延平王克復台州

授鄧凱爲隨扈總兵守大明門

是年冬十月初七日 上遣內臣李崇貴召凱  
入朝 上曰爾忠義老成可卽隨護東宮賜銀  
一百兩賜銀鼎盃一隻

冬十二月十五日 駕離滇都傳幸永昌

新津侯譚宏仁壽侯譚毅總兵譚憲譚大圖俱降  
于清

文臣方疇等同降

鞏昌王山文選以兵二萬人守貴州七星關敗于清

曲靖知府蓋世祿降于清

世祿貴州畢節衛選貢生也

十三年紀春正月朔

初三日清兵入滇都

提督總兵劉之扶許大元總兵王宗臣王有德副將朱文彩朱文盛提學道徐心箴光祿寺少卿管雲南分巡洱海道黃復生等俱降于清復

生仍管洱海道心箴署臨沅道

初四日 駕幸永昌

吳兵已入貴州 上在雲南倉卒聞報羣臣束

手無措太僕寺正卿辜延泰仁壽人請駕即日幸

蜀開荒屯練以圖便利 上意未決晉府中書

金公社雲南極言入蜀不利是時文武臣僚滇

人居多皆思保妻子弗欲遷勸 上寢之吳兵

分道前進一從火洪龍元安龍八一目率諸將

從烏蒙入 上聞警卒起行先生至永昌

沅江知府那燾起兵戰敗登樓自焚父子夫婦  
闔門皆殉義死

泰安伯竇民望力戰不克死之

時晉王兵駐磨盤嘴先遣大定營泰安伯竇民  
望領步兵三百人前行與吳兵遇民望誓將士  
爲殊死戰自持震刀殺吳騎將數十員騎步兵  
三十餘人益畏縮欲退是夜民望復謀文勝捷  
擊吳軍將行爲小子所洩吳知之別遁得免明  
日民望復殊戰死三百人且盡尙存一小子奔

吳營降吳詢知民望合鎗砲齎發民望受數百鎗彈從脅穿透戰如故持刀潰圍走尋上所  
在行三十里血湧仆地死吳遂整兵前進

晉王李國退入交趾

閏月十八日 駕幸騰越州二十日遂行以靳統武爲護駕總兵

其兵卽孫可望之衆也念一日統武竄去

二十八日 駕入緬關緬人來迎

二十九日 駕留蠻莫次日遂行



初上在永昌大學士馬吉翔編修貴州塗敷功  
吏部左侍郎四川鄧士廉大理寺正卿齊環沐  
國公天波左衛將軍四川徐鳳翽等二百餘員  
及家口二十餘人不俟大軍齊發先入緬界  
是月雅州伯高承恩及諸土司據兵守境

二月 朔文武諸臣自騰越齊罪緬境

初四日馬吉翔李國乘<sup>恭</sup>太后東宮先奔井梗

初五日鞏昌王白文選遣兵至哩哇城迎駕不值  
而去

禮部侍郎潘琪卒

十七日清兵人永昌騰越州

十八日駕幸井梗是晚文武諸臣會于御舟前議遣總兵鄧凱行人司任國璽使緬馬吉翔止之

吉翔恐二臣先行言其過也

二十八日遣馬雄飛鄔昌琦使緬

緬王請大臣過河相議乃遣二臣惟通事傳說皆神宗時事所去敕書彼出神宗敕相對分寸不符疑以爲僞出沐國公印相對乃信緬

因 神宗二十二年因亂來滇請救本朝不允  
遂絕貢

三月

通政司朱蘊金總兵姜承德白縊死總兵潘世榮  
降于緬

沐國公天波綏寧伯蒲繆晉王總兵王啟隆等  
集于大樹下天波曰緬酋待我日疎可就此處  
走護勒撤孟良等處爲善吉翔與李定國有約  
力阻之十七日陸行者到煙哇對河離城五六

里而營緬酋疑我圖吳國發兵圍之有波傷者  
餘各星散晉王總兵潘世榮卽降于緬通政朱  
蘊金吉翔中軍姜承德各縊死

夏四月馬吉翔舉錦衣衛丁調鼎考功司楊生芳  
使緬國

二十六日大理寺卿徐環卒

安隆所總兵周文隆降于清

文龍自田州遣弁赴肇慶納降

光祿寺少卿盧桂生降于吳三桂授大理府知府

時晉王遣應奇說桂生歸正應奇被執送吳三桂殺之

五月初四日緬王遣官以龍舟迎駕

初五日駕離井梗

初八日緬王羈駕于孟坑城外

地居者梗

緬王接駕見中國男女財帛心利之欲圖害

上遂謀奉駕安置孟坑城外四面皆海人不得通初七日駕至哇哇城對河結營初八日進者

梗卽前陸行者所札地也構草房十大間 上  
居依然以竹爲城每日百餘兵守護

初九日緬人進貢 上優賜之

相傳緬婦每日貿易如市諸大臣皆短衣洗足  
混入緬婦貿易據地雜坐談笑緬官乃曰天朝  
大臣如此規矩安得不亡

行人司任國璽請設廠衛

十六日儀制司 朱冲卒

江西宗室

以使緬功楊生芳文選司郎中加丁調鼎五級  
敕緬隘官截止追駕官軍

馬吉翔與緬隘官敕一道內云朕已航閩後有  
一切官兵都與截殺

六月安德侯狄三品執馮雙禮獻于清授杼城侯  
三品雲南建昌總兵雙禮已封郡王

二十一日安南臣武公姿降于清

武公姿官宗國公遣人至雲南獻降表

二十二日延平王舟師克鎮江圍南京旋退入海

總兵甘輝等死之

高承恩爲其弟承裔所殺

部將爭立自相攻擊

清獻馬瑚敘州

伯提督總兵陳希賢等降

鄖中郝永思等固守

秋七月清陷成都總兵趙友馴等降御史龐之泳

主事賀奇俱繳印降

清道川南道高毓苔招降原任四川巡撫萬任

八月滇國公沐天波使緬甸入其城



緬俗以八月十五日各蠻來貢欲張大聲勢天  
波至彼令跣足以緬臣禮見天波不得已從之  
歸而泣告于衆曰我故屈者爲保全 皇上計  
耳禮部楊在行人任國璽各疏劾天波屈節于  
緬夸疏留中

上不豫

以患足故

九月緬人進稻穀

緬進稻穀給各窘迫者吉翔據爲已物私其所

愛者鄧凱不平于朝內大罵之時有吳承爵者  
乃吉翔之旗鼓粹仆凱于地損一足

光澤王儼鐵大學士郭之琦總兵楊祥被獲不屈  
死之

時雲南既陷之奇等避入交趾交夸懼縛送廣  
西被害之奇絕命詩云十載艱虞爲主恩居夸  
避世兩堪論一聲平地氛塵滿幾登幽山霧雨  
翻曉澗哀泉添熱血暮烟衰草送歸魂到頭苦  
節今方盡莫向西風灑淚痕成仁取義憶前賢

異代同心着幾鞭血比蓑弘新化碧魂歸望帝  
久爲鶻曾無尺寸酬高厚唯有孤丹昭簡編萬  
卷詩書隨一炬千秋霜管俟他年祥蜀人不識  
字以忠義自許臨難神色不變望西叩首謝恩  
危坐就刑觀者無不流涕

命造曆日

從鄧凱請也

冬十月郝承裔以嘉定邛眉等州叛降于吳三桂  
未幾承裔反正至辛丑年被獲死

蜀鎮寧侯王友進遣官降于吳三桂

安南都統使莫敬耀入貢于清

是冬嘉靖州陷殺祿

十四年庚子春正月 駕在孟坑城外

德陽王至濬降于清

至濬初奔交趾與太監王應遴同匿高平境內  
自安南莫敬耀後勢益孤危故至濬亦降

三月初一日賴國公楊武叛降于吳三桂

三桂令楊武招降貴州布司政朱企良

岷藩宗室武

靖侯王國璽兵部侍郎尹三聘編修劉茵尚寶  
等楊楨幹知府范春鰲等六人六人遂繳印降  
赴北

大學士方端士降于清

禮部司務王應偉卒

秋七月緬人邀滇國公沐天波再入其城不允

緬使曰此番可冠帶而去天波終不允

八月郝承裔以雅州內附

九月晉王李定國出孟良與白文選入緬關次日

桐伯疏請迎駕不果

定國迎駕疏內言前後三十餘章不知曾到今  
與緬王相約何地交遞而諸臣在內只圖安樂  
全不關節出險緬官求救一道去了外俟久無  
消息乃拔營而去

以湖廣道御史鄔昌琦改陞河道掌六科

從馬吉翔所薦也

授烏撒知府王祖望禮部主客司

祖望晉王藩前人能醫中宮有疾用其藥而愈

太常寺博士鄧居詔疏陳時事

居詔疏爲停止不急之務仰祈修省等事內侵  
吉翔及各員自謀自銜等語蓋指行人任國璽  
欲轉江西道而言也吉翔怒奉 旨該衙門知  
道旨方下而國璽同道及各陞轉 旨旋下矣  
居詔不平卽劾國璽國璽亦劾居詔一日 上  
召面質不果惟吉翔國泰傳古云鄧某當學好  
免杖

碎國寶以給各員

吉祥奏外有大臣三日不舉火者 上不信次  
日吉祥國奏復合奏 上怒擲皇帝之寶命掌  
國太監李國用碎之國用叩頭辭不敢又次日  
吉祥國碎之以散給各員 上怒曰你們要收  
門生特把朕作人情耳

十五年

辛丑

春正月

駕在孟坑城外

二月吳三桂破爲乃麻衣

龐吉兆吉佐等俱被獲

咸陽侯祈三昇降于吳三桂



三昇與定國不和獨走戶臘三桂遣官招之遂  
率兵七十餘人涉遠而降孟津伯魏勇總兵劉  
芝林王有功邵文魁等俱降勇旋病歿

鞏昌王白文選賚奏迎駕

念八日白文選遣緬民賚奏至云不敢速進者  
恐爲所害必令彼送出爲上策璽書答之曰不  
五六日離本處止有六七十里已搭浮橋來矣  
數日後緬兵斷浮橋而去吉翔國泰挾駕自重  
不思出險或欲暗相糾結擁東官因殺吉祥國

泰奪路而出卽爲吉翔國泰所覺密奏其結盟  
投緬旨命錦衣衛搜獲爲首者殺之

夏四月赫承裔被獲死

御前總兵馬寶降于吳三桂

五月朔大學士馬吉翔司禮監李國泰入宮講書  
賜之坐

江西道御史任國璽奏爲時事二不可解謂上  
年本請開講期年不行今勢如累卵不思出險  
尙然如此講書必須科道侍班議軍務則有沐

勲臣王皇親等豈翔泰之獨君也言詞切直次日旨下着任國璽獻出險策國璽奏能主入綱者必能主乎出綱今日事勢至此乃卸肩于建言之人乎時王祖望鄧居詔各疏劾翔泰有內官曰爾上千金萬本亦何用其擅權若此禮部楊在講書賜之坐典璽李崇貴以爲非禮次日亦賜崇貴坐崇貴辭曰今雖亂世禮不可廢每講崇貴出外一日東宮問楊在曰哀公何名在不能對

初五日瑞昌王薨于緬甸州

二十二日緬酋莽猛白弒其兄

先是御前總兵馬寶降于吳三桂卽使爲閒至緬王備言矣○三桂所以遣之故且曰苟能送帝出則富貴可立至也緬酋于是令寶至孟坑居上左右上以寶爲舊城臣弗之疑也緬酋旣受三桂命遂決計出獻其親兄知之謂曰不可因人之危而爲之利不義且彼兵至也天之所立中土之所戴我不能助而反爲之害是逆天

也逆天不祥不如且全之任彼後圖緬酋卽縛其兄弒之

六月十八日緬酋僞請盟馬吉翔李國泰等從之緬使來云我王初立怕你們立心不好請去吃咒水等你衆人走動好去作生意不然日用亦

難云

十九日緬酋殺我文武官僚三十餘人

吉翔國泰聽信緬酋之謀不論大小官員俱攜去與緬酋盟已刻緬酋以兵三千圍所扎處乃

日爾等大漢可出來吃咒水一箇不出來卽亂鎗殺死諸臣良久乃出出俱被執而死松滋王已下馬吉翔馬雄飛蒲纓鄧士廉鄧居詔楊在鄔冒琦任國璽王祖望裴廷謨楊士芳學錄潘璜郭璘典簿齊應選總兵王自金安朝位陳謙龔勳吳承爵張宗伯錦衣衛大堂任子信張拱極劉相來宗宰劉廣銀宋國柱丁調鼎司禮監李國泰東筆字茂芳楊宗華李崇貴又周某盧某曹某沈某俱失名

馮幸黔國公沐天波署緬僧進食

黔國公沐天波靖來將軍魏豹總兵王啟隆等俱  
遇害

上與中宮將自縊鄧凱勸之曰 太后年老將

誰爲依 上乃止緬兵入官搜取財幣貴人宮

女及各官妻孥自縊者甚衆 上與太后等二

十五人俱聚于一小房經險二時忽通事引守

護緬官至乃喝曰不可害皇上與沐國公彼時

尸橫遍地緬官請 上移出沐國公房內大小

二百四十餘人怡住一樓母子啼哭聲聞里外  
閱三日幸有緬僧私進飯食且悲哀不已乃知  
早去各臣悉被殺時有沐天波王昇魏豹王啟  
隆各傷緬兵數人而死有皇親家小子名來安  
年甫十三兵擒之乃曰有銀與你抵腰假作取  
銀乃拔小刀刺傷緬兵而死

吉王自縊薨

吉王同妃入宮自縊皇親標下總兵姚文相黃  
華字熊惟寶馬某秦某錦衣衛趙明鋒王大維



王國相吳承胤朱文魁鄭文遠李旣白凌雲尹  
襄朱議添千戶吳某百戶嚴某內官陳德遠劉  
楊二貴人松滋王如皇親任國璽姜承德妻楊  
氏俱于十九日自縊死 又起陸諸人先後遇  
害者通政司朱蘊金姜承德藩世榮而鼎忠范  
存禮溫如珍副總兵高陞李勝武崗用恨王馬  
九功王皇親標下望典隆戴某張某陶某內府  
劉九臯劉衡汪國泰段能忠謝安祚

施氏曰緬酋旣弒其兄遂以次殺上左右從官

緬酋將天波至城上木板鋸解以示城外上  
遣人登城遙諭曰事已不可爲矣從朕文武各  
官各已見害城上所居解者卽沐上公也朕亦  
萬無生理可致謝晉王各自爲計否則城外當  
有變矣王及諸將士皆下馬羅拜大呼痛哭聲  
振天地上遙聞亦哭次日晉王憤恨悲號遂  
大勦孟坑城外難犬不留而去自是人心無主  
兵多散去

秋七月緬人貢物

念一日緬人乃修原所請衆人安住貢米銅器等物念五日文進獻鋪蓋銀布等物甚厚乃曰我王子實無他意因爾各營在外殺害地方遂恨入骨乃衆民所爲也

上不豫

冬十一月初八日吳三桂兵至木邦

白文選遣副將馮國恩至木邦偵之中伏被獲國恩遂降于三桂爲嚮道

十八日 上召總兵鄧凱入宮

是日午刻召凱入宮諭曰 太后病矣而賊信  
又急爲之奈何白文選朕欲封他爲親王馬寶  
欲封他爲郡王

吳三桂兵至錫波白文選奔茶山

二十日三桂發兵追文選于茶山

二十四日吳三桂入緬甸境

初三桂在騰越宋腮兩遣人通緬酋使送駕出  
降否則加兵緬酋益決計謀逆

十二月 朔吳三桂兵駐舊晚坡

舊晚坡在緬城之東是日緬相錫真持貝葉緬  
文降于三桂其文有願送駕出城但祈來兵退  
扎錫坡猶慮三桂之襲其城也

初三日緬酋內叛來 上及 皇太后皇后皇太

子公主如舊縣坡緬酋殺華亭侯王維恭

是日未刻二三緬官來見曰此地不便請移別  
所爾門兵將近我城我處發兵必由此過恐爲  
驚動言未畢數蠻子將 上連柷子擡去 太  
后等悲聲震天行至二百步乃有轎二乘至

太后等上轎大小男女毫未收帶步行約五里渡河到岸暗黑不識何兵二更到營始知爲吳三桂矣初四日歸老營初五日曉鄧凱匍匐

上帳前曰今日事至此 皇上當行一烈使老臣得其死所 上曰固然有太后在且洪某吳某世受我家恩未必毒及我母子初六日援老營復轉啞哇欲攻緬城未遂初九日長發還洪一路大小俱與馬匹進御膳用金碗不用銀碗 上與東宮俱進鮮服鋪蓋內官宮女各官妻

妾均與衣被

吳三桂以車駕還南

施氏曰吳三桂兵亦出境將入緬路遇鞏昌王  
白文選是時文選兵尙強因山路窮僻斥堠不  
通猝遇無計不敢戰遂降自是三桂無所忌憚  
矣緬恐遂令馬寶誘上曰晉王兵去此未遠  
臣欲從閒道奉駕奔其軍上從之緬使人從  
上所至則吳軍矣

十六年

壬寅

春正月十三日駕還滇都

三桂日進膳服等物俱倍前

夏四月 太皇太后王氏不食崩

三桂令人奉 上居滇故都督府等嚴兵防守

八旗兵皆集 上屢欲見三桂三桂不肯見

皇太后不食 日遂崩

原任戶部尙書龔燁死之

燁永州人天啟乙丑進士也具酒餼進謁 上

所守者不許燁厲聲曰此吾君也我爲其臣君  
臣之義南北皆然我祇一見耳何拒我爲守者



往啟三桂三桂許之彞遂入堂上設宴請上  
出朝禮畢進酒上稍謝痛哭不能飲彞伏地  
痛哭亦不能起再勸上飲上勉飲三爵彞  
再拜不止遂觸地而死上撫之慟幾仆

上崩 皇太子遇害

施氏曰從官扶上進入旗諸將士皆望而呼  
萬歲曰此真主也我等雖有主今知其安在不  
如奉此以成不世之功事將成滿漢諸大臣皆  
割辮而起爲下所洩三桂知之大驚卽令輦

上又皇太子出以弓弦絞于市時太子年十二  
臨難大罵曰黠賊我朝何負于汝我父子何仇  
于汝乃至此耶是日天大昏黑風霾並作人影  
不見上既遇害三桂使人炙尸揚灰傳賜請  
將前所謀奉上八旗諸將士共二千餘人皆  
殺之令沒其妻子

襍錄曰吳三桂標將有商于吳者問以舊晚坡  
之事據云十二月初二日三桂至舊晚坡檄緬  
送駕緬亦遣人相聞薄暮緬人送人首十七至

至三桂營營中訛言駕崩及三鼓謹言駕至矣  
隨衆出迎見二艘渡江來一爲上及太后

中宮東宮公主一爲遇害諸臣家屬有緬相  
及蠻兵二百餘人俱至三桂送 上及宮眷于

公所 上南面坐達旦三桂標下各官相繼入  
見或拜或叩首而退少傾三桂進見初甚倨傲  
見 上長揖 上問爲誰三桂噤不敢對再問  
之遂伏地不能起及問之數至始稱名應詔

上切責良久三桂緘口伏地若死人 上卒曰

今亦已矣朕本北京人欲還見十二陵死死爾  
能任之乎對曰臣能任之 上令之去三桂伏  
不能起左右挾之出則色如死灰汗浹背自後  
不復敢見

吳三桂以總兵鄧錫勳隸滿州鑲黃旗不受爲僧去  
秋七月吳三桂遣藩下蝦護送 皇后公主至北  
京奉 旨命禮部養贍于別室仍撥宮女二人奉  
侍

是月二十九日晉王李定國薨于景線

定國薨後以世子嗣典記斬統武統武奉嗣典  
爲晉王有馬斯良者定國之表弟心忌統武遂  
勸嗣典降于三桂

附記王寅隨駕回滇諸人

吳師相炳一子一女同妾子名宏猷南京人

鄔昌琦一子三歲魏豹一子宗臯南京人 妾

承德三子北京人 丁調鼎二子 趙明鑑一

子一僕 黎應祥千戶廣東人 王祖望小子

新兒 鄧居詔家丁鄧玉前府都督康晉生一

子 總兵鄧凱 東昌李君調云緬酋送駕

舊晚坡在庚子十二月而龍馭賓天 皇太子

遇害則辛丑三月十八日也君調時在三桂營

中目擊者此云壬寅未知何據

行在陽秋終